

怡 堂 散 记

清·许豫和著

项长生 点校

怡堂散记 序言

曹 序

《橡村痘诀》一书，予既读而序之矣。橡村先生以医名吾乡，固不特善治小儿，更不特痘症。予颇疑橡村胡不尽出所学为寿世资，而仅使蒙其庠者在小儿也？今橡村又出书一册，曰《怡堂散记》，分上、下二卷，又《痘诀余义》一卷，予受而读之。其书列病症，详医方，以已所临治有验者，悉书其原委曲折，各加论辩，以与古相发明。盖进而上焉，不独使幼孤得遂长矣。予不知医，窃怪岐黄以降，其书几汗牛充栋，学者习焉而守其法足矣，胡为作者代兴，必各矜创获，迭擅神奇，乃以成救世之效？以是知理之无穷，而其法亦随时有异也。夫《灵》、《素》经书，千古不易。而天地气化，人生禀赋，随时为厚薄。且南北异宜，山川间隔，一郡一乡气感各别，即一乡之中又随世变转，而寒热水旱之不齐，错出乎其中。吾见今之疾不必同古之疾也，又况药物之产随地气变迁，或同一名而古今迥殊，或犹是一物而前人审验未真，久而益辨者而谓第执成言，遂可自足也哉！橡村博览古书，相时症之变，融会变通而出之。其于药物皆细加考验，谓“必使吾之精神与药之气味，两相融洽而后药为我用”。其用力也勤，其用心也诚矣！今不敢自秘，将出以广其传。吾不知此书果尽今之病症及治法与否，传之后来又有因时而变更者与否，要其有益于时者固已多也。又况杂采群书，俾知人物之生与天地阴阳相消息，推气化之原，以正性命之养，尤遽然通道术之要，而士君子所当深致体验者哉！板焉而试其功用，吾见较前刻之大而远也，于是乎言。

嘉庆二年岁次丁巳秋九月竹溪曹文植拜手①

①署名下有“清宮太保大司农”印及“曹文植”印。

怡堂散记 目录

序 言 卷 上

卷上序目：

散者，无头无绪不整不齐之谓。老医临症数十年，终日应酬不暇，得心应手之处，思欲记之，有时研砚而客至，有时执笔而饭熟，于是失者十之七。心之所向，欲舍不能，随时记忆，存于腹稿，大概不在途中则在枕上，此诊治之散记也。讲习古方，节录名言，蒐罗于寒夜，是涉猎之散记也。记虽不多，类而推之，其理不外是矣。

风痰七条	1
惊风发搐六条	2
春杪夏初多见发热不退之症治之屡验因记之	3
论暑月吐泻初起须用黄连香薷饮七条	4
甲辰秋时痢甚计其所见复论症记之二十六条	5
杂治得心随录可为法者二十二症	8
方脉治验随录十五症	15
病可治病家不知信任者录四	20
见而不能治者录四	21
见闻事实录四	22
妇人病	23
看虎口	24
小儿常有之病	24
幼科少见二症	25
华先生《中藏经》论治	26
喻嘉言先生议病式	27

与门人定仪病式·····	27
医家必读全《经》始知治法·····	28
诊治杂言·····	29
又论治体·····	30

卷 下

卷下序目：

读古人书全在得解，啍味读过虽多何益？临病制方要从古法，不由规矩何以为工？医之为道，实万世岐黄之道，所言者天下之公言，非一家之私论。偏执之流，不以人命为重，各私其学于家，气候不分，寒热不辨，执守一方，终身行之而不悟，受其害者，何可胜纪？予欲唤转迷途，不辞苦口，将古人未畅之旨，醒出一二，启悟后来。愿学者，临症推详，以求合乎先贤之治，计其效验，归之大公，由是而深造逢原，私心自涤矣！

“肾者主水，受五脏六腑之精而藏之，

故五脏盛乃能泻”解·····	32
脾主长夏说·····	32
秋伤于湿辨·····	33
肝藏魂肺藏魄·····	34
肝沉而肺浮·····	34
邪之所凑其气必虚·····	34
三阳结谓之隔·····	34
伤寒小解十条·····	35
阳常有余阴常不足·····	37
大家论治八条·····	38
又录名言六条·····	39
制方之难·····	40
七方之制·····	40
千金参麦汤·····	41
桂附八味丸·····	42

阴八味·····	42
六味丸·····	42
逍遥散·····	42
滋肾丸·····	43
玉屏风散·····	43
五苓散·····	44
地黄饮子·····	44
清燥汤·····	44
补中益气汤·····	45
清暑益气汤·····	46
葛花解醒汤·····	47
枳术丸·····	47
六一散·····	48
青蒿丸·····	48
火花膏·····	49
举卿古拜散·····	49
因病制方·····	49
药性解·····	50
人参·····	51
地黄·····	53
肉桂·····	54
附子·····	54
炮姜·····	54
白附子·····	55
款冬花·····	55
大黄·····	56
陈皮·····	57
厚朴·····	57
天麻·····	57

桑寄生	57
龙骨	58
黄土	58
盐	58
姜 枣	58
辰砂 琥珀	59
饭膏	59
甘草	59
节录名言医者当识	59
续刻落成喜而占此	60

怡堂散记 卷上^①

风 痰 七条

风痰一症，乳儿最多，四时皆有。大概冬春之交宜温散，荆、防、甘、桔、橘、半、生姜、杏仁、苏子之类；夏令宜清散，杏仁、牛蒡、梔子之类；秋令宜清润，枳壳、瓜蒌之类；冬令严寒，有用麻黄汤而解者。肺为娇嫩之脏，总宜疏解，不得妄投丸散。

肺虽喜润，胃中湿痰宜燥。小儿乳腻生痰，外症有鼻水，多涕泪。二陈为治痰总剂，合之前胡、桔梗、荆、防、苏子、枳壳、麦芽、杏仁之类，或加生姜、葱白，结者散之，保赤之善也。

肺喜润，润之中亦有分辨，如杏仁、苏子温而润者也，宜于冬春；杏仁、牛蒡散而润者也，宜于夏；杏仁、瓜蒌则清而润者矣，宜于秋燥，能知此等界限则用药不杂。

瓜蒌一味能发呕，易滑泄，乳儿无用瓜蒌之理。谷食之儿，燥火伤肺，嗽久不止乃可用之。

半夏毒轻，姜汁制而陈者性平，故可入君子汤；南星毒烈，实非良药，制以牛胆之苦寒，病久胶结或可少投，时行感冒无可利用之理。竹沥、姜汁之润下，海石之咸能软坚，尤非风痰可轻试者。

书云：蚕与马并属午火，在卦为离，主心。又云：蚕食而不饮，性燥，得湿则腐，得风则僵，故能宣风化痰，辛温之药也，

^①下署“古歙许豫和宣治氏著同 伍培根树人 伍孙毓珪执之较”。

风寒闭结者宜之，痰热结聚非所宜也。

肺为贮痰之器，只有开提一法为解化之用。世俗之化痰丸徒伤胃气耳。至若王隐君之礞石滚痰丸，为治顽痰怪症而设，于小儿有何干涉！

风痰乳滞，小儿轻病，不从疏解，而事丸散，杀儿实多，目睹心伤，为之苦口。

惊风发搐 六条

辛亥首春，嬰幼多惊风之患。此天行之病，气候使然。经曰：己亥之岁，上见厥阴，厥阴司天，其化为风。

小儿纯阳之体，冬月伏阳在内，生痰生热，乘春气而病发，惊风作矣。医家视其色脉，察其虚实，当为之清痰热，平肝风，则风熄而热平。粗工昧此，但持通套之方，予见用荆防柴葛者，病不能除而加甚，用羌活者一服而惊厥不回。因制对症之方，取效甚多，示以为法：

连翘 赤芍 炒山栀 天麻 钩藤勾 橘红 半夏 代赭石 茯苓 甘草

加灯心、金器同煎。

肝以散为补。荆、防、柴、葛皆疏散肝风之药，肝家有郁热，宜用以疏达肝木。病逢春旺，若再达之，是助纣为虐矣，故一概疏肝之品，皆叱不用。连翘、赤芍、山栀、灯心泻心肝之蕴热，所谓实则泻其子也；天麻、钩藤所以平肝，代赭、金器所以镇肝，肝木既平，惊风自熄，再加二陈以开痰结而保脾土，盖风木旺则脾土自亏，泻其太过，补其不及。药虽平淡无奇而功用切当，未可移置他时者。医贵变通，必先岁气，举此可为法也。

凌氏子，患惊风，大便下青黄沫，日五六次，本方加白术、车前、冬瓜仁去灯心，二剂愈；仰氏子，惊作，日夜十余次，加辰砂、琥珀二分，二剂愈；毕氏子，摇头目窜，战栗不宁，加菊

花、桑寄生，二剂愈；茶园孙氏子，手足反张，面青咬牙，加羚羊角、川芎，二剂平，去灯心、山梔，再加当归、白芍，二剂愈；王氏子，食入作呕，除梔子、灯心、赤芍，加白术、藿香，二剂愈。此皆春二三月病也。

风木之旺冬至，后甲子日为始。经曰：“巳亥之岁，上见厥阴，厥阴司天，其化为风。”风令最早，小儿得春气之先，风胜则动，其病为搐。

岁气之病，各有所主。此专言巳亥之岁。如子午之岁，上见少阴，少阴司天，其化为火，火则旺于夏，钱氏泻心、导赤为对症之方；丑未之岁，上见太阴，太阴司天，其化为湿，民病吐泻、风痉、胃风，胃苓、羌活胜湿之类，甚则加黄连，又为对症之药也。

春杪夏初多见发热不退

之症治之屡验因记之 七条

小儿纯阳之体，四月为纯阳之月，若乾之上九，六阳皆现，小儿时感，多有发热不退之病。幼科用药，无非发散消食，甚致乱投丸散，胃气为药所伤，病不能去，食减人困，累成慢惊者有之。凡病已得汗，表既开而热不退，二便皆利，里无阻滞而热又不退，再发什么表？消什么食？予遵钱氏诀，制救阴煎，从时令上用药，经所谓“必先岁气，毋伐天和”者是也。八九月秋燥亦宜之。

生地 丹皮 麦冬 陈皮 茯苓 甘草

此方止六味，而归重救阴。外见有风症再加柴胡、防风，惊惕加钩藤勾，嗽加桔梗、杏仁，有痰或呕加半夏、苏子，吐乳加麦芽，泄加神曲、泽泻，大便不出加梨汁，小便不利加山梔、木通，唇红舌疮加连翘、山梔、贝母，午后夜间热甚加青蒿、地骨。

论暑月吐泻初起须用黄连香薷饮 七条

长夏暑湿当令，脾土受病，暴感时行之气，多有发热吐泻者。吐泻里症也，发热汗出表症也，口渴心烦，表里俱病，黄连香薷饮为对症之药，一服可平，再服可愈。庸俗不明此理，例用疏散消食通套之方，药病不合，徒伤正气，吐泻不止，精神已困，额热指冷，目陷神脱，虽名暑风，实与慢惊同类。病家恐骇，每每更医。医有见其额热、口渴，暑症犹在而用黄连者；有见其发热、指冷，表症犹在而用香薷者。不知吐泻大作，胃气暴伤，故目眶陷而四肢冷；暑邪内陷，故内热、口渴、心烦。其治法与初病不同。初病正气未伤，可服黄连香薷饮，故一服而效；及待胃气既伤而始用，是用于不可用之时也。一见目眶陷、四肢冷、长虫出，虽有额热、口渴、心烦等症，总以六君扶正为主；体素实者，少加土炒黄连于剂内；若囟门陷、面脱白，体素虚者，虽有热症，六君子只加扁豆花、黄土水甘寒之品，以清脾胃之暑。一切金石等丸摒弃不用，庶几十救二三。若汤丸乱投，十不救一矣！长夏秋初，小儿患此者，岁岁皆然。予前有参连饮之论，又有黄土稻花汤之论，皆属后起之功，点破机关，莫若黄连香薷饮劈头一服之为愈也。

新定黄连香薷饮

香薷 黄连 厚朴 麦芽 生扁豆 木瓜 陈皮 半夏 茯苓 甘草

分两量儿大小。

暑伤脾胃，解暑为急。故用香薷从外一升，黄连从里一降，药之担力，二味为主，剂之偶者也；厚朴、麦芽以平胃气，扁豆、木瓜以和脾气，二陈和胃以行痰，水湿伤脾之症，何患不除？临症虽有加减，亦宜斟酌，不可轻易变乱，万万！

未至盛暑，霉月湿甚，多有风湿夹食之症，发热吐泻，又宜

香砂平胃、藿香正气等方。黄连香薷是暑热之药，风湿非所宜也。

暑邪初感，病气方盛，虽体质素虚，亦宜劈头一服，盖清急于补也。病经多日，目陷肢冷，虽有热症未除，亦宜六君扶正，盖补重于清也。

四肢冷不得用黄连，泻痢皆然。尤当视唇舌，唇舌绯红干渴，四肢虽冷亦有用黄连者，是用黄连又当以唇舌为准。壮热烦渴，吐泻初作，黄连生用。吐甚者姜汁炒，泻甚陈土炒，皆有分辨。

单吐而不泻者最恶，宜加代赭以镇逆。泻而不吐无热症，六君不能止者，钱氏益黄散是为对症之药。凡止泻，丸散优于汤剂，宜备用。

加减钱氏益黄散

青皮(醋拌炒)三钱 白术(土炒)五钱 木香(面裹煨)三钱
诃子肉(同左)四钱 炙甘草三钱

共为细末，磁瓶收好，或用六君调下，或炒米水调下。

甲辰秋时痢甚计其所见

复论症记之 二十六条

河间云：下痢红白，俗谓赤热白寒者，非通作湿热处治。又云：寒则不能消谷，何由反化为脓也？又云：俗言寒热相兼，其说尤误。寒热异气，岂能俱甚于肠胃而同为病乎？通作湿热处治，此定论也。

问：下痢之本，必由夏伤于暑，常见时气传染，感而病作何也？

予曰：是人肠胃中本有伏暑兼有停滞，时气相引则病作。我无伏暑，何患时气？

问：下痢脓垢，白如豕膏，此何物也？

予曰：是肠胃中脂膏也。俗名刮肠痢，热逼肠胃，如刀刮而

下也。肠胃脂膏以厚为贵，刮则腹痛，腹痛则作努，而所下无多，非糟粕是脂膏也。刮多则肠薄。洁古云：宜黄连厚肠胃而止痢。玩“厚”字之义，自知刮肠之病也。

问，河间言“通作湿热处治”，古名家治案亦有用姜附而愈者何也？

予曰：此伤于瓜果生冷，或食烧炙之后饮冷贪凉而成，故其初起以温药佐之效。若屡进，必加甚矣。

凡痢疾身热脉大者不治。予重用芩、连一二服，热渐减，脉渐平者，续用调中之剂亦愈。

唇红口渴者不治。有用黄连、乌梅者，有用人参白虎者，但得应药，即有转机。

见食即呕不治。《名医类案》云：方荫山治一小儿，八岁患时痢，日夜百度，食入即呕。以面作饼炙熟，分二片，以一片中空之，用木鳖子三个去壳捣烂，加麝少许，填入饼中，贴脐下，软帛系定，外用热鞋底熨之。待腹中作响，喉中有香气，即思食，食少进。是夜痢减半，三日后渐愈。予用此法治噤口痢多验，胜于用田螺多矣！

渴而思酒者不治。渴之甚，茶水不能解，故思酒。呕甚作哕声者不治。呕之声短，哕则其声重大而长。胃中空则邪热干之，实作呕作哕。呕出长虫者亦不治，皆验。

目陷神脱者不治。额汗指冷者不治。若欲救之，急用四君加木香、干姜，此芩连之过剂也。

长虫下多者不治。胃气败，虫不得安也。

粪门如竹筒者不治。茎头起白点者不治。

痢多曰肠胃热甚。有口角鼻门疮烂者，有腮肿牙疳臭烂者，有身发紫斑者，有肛门湿烂作痒者。此等见症，皆由初起不善治而得，或误服辛热药亦有之，与伤寒狐惑胃烂发痲同类，不治之症也。若欲救疗，急须白虎汤加黄连。

下痢脱肛，有虚有实。虚者略努便脱，色淡而不甚肿，宜补中

益气汤，陷者举之。肛门痈肿，努甚脱出，色如紫李，身热脉大，此为湿热下逼，芩、连、山梔佐以理气升提之味。

肛门脱出不宜见风、洗冷水，犯之则难收。有痢止而肛不收者，湿水频洗，软帛托入，再用石榴皮煎水洗之，或用热醋沃新布折坐亦好。

用药有三法：霉令长夏湿胜于热，治宜从湿；入秋则热胜于湿，宜清热；秋深久亢则湿气尽消，燥气方胜，用药不宜燥利，盖痢甚津液既伤，燥与利皆损液之药也。

霉令湿胜，用平胃散加防风、葛根以升清气，少佐芩、连以清热，山楂、神曲行滞。一二剂后，再加赤芩、泽泻、车前以渗之。

入秋热胜，初宜柴、葛以升清，芩、连以泄热，厚朴、槟榔、木香以通肠胃之壅闭，车前、木通以导其湿热；食滞不行，神曲、山楂、麦芽以化之；腹痛甚，芍药、甘草以和之。热势稍平，然后芩、连可退，再加和胃之品。

发于秋深久亢，口渴唇燥，舌起黑煤者有之。津液大伤，贫士无力服参，予尝用沙参、麦冬、生地、甘草以生津液，少加芩、连以泄热，白芍、木香以和血行滞，变燥为润，因乎时也。痢有噤口刮肠之辨：噤口者，治在胃；刮肠者，治在肠。噤口者，得食便定；刮肠者热不除，虽能食亦死。盖脓垢从肠中刮下，始而肠薄，渐致肠化，湿热蕴于肠中，如痈脓之腐烂而化出也。

肠刮而腐化者多属小肠，故红痢，腹痛甚，痛甚则肠断而死，以大肠肥厚而小肠薄嫩也。

小儿夏月暑湿之热客于营卫，结成痒痢。入于肠胃则为泻痢。痢之红白如疳之脓血，脓血不尽则疳必不收，红白不尽，痢必不止。

其时疳痢并作者数人，皆用和解行滞之剂。疳先止，痢亦渐减。惟惊与痢并作者竟不能救。

溪南吴氏子，六岁，园中随赏桂花，其夜发热腹痛，天明下痢，上午惊作，连下数行。延予至已二更矣，急入诊视，额汗指冷，脉息已绝。后数日又一三岁子，亦于夜间发热腹痛，天明惊作，旋下白冻。延予至，见其病难救，不忍坐视，勉与平肝风、扶脾土之剂，六君加柴胡、钩藤、山栀、白芍、木香、车前，一服而惊稍定，二服而食稍进，但腹痛下痢不减，第三日清晨连下数行而脱。予所见惊与痢齐作者竟不能救。有惊定热退而后痢作者，又在可治之例。

有痢后作惊者，脾土亏败，肝木生风，亦不治之症。

痢后多有浮肿腹胀之患，大概服芩连之后，热症既除，寒症续起，四肢冷，皮色白而光亮者是也，总以补脾去湿为主，不得用辛热药。

有痢止未久而复作者，腹痛后重，粪后有脓血，名休息痢。此湿热伏于曲肠之中，最难速止。予用补中益气汤加白芍、木香、茯苓、车前子之类，多愈。

杂治得心随录可为法者二十二症

家虞部奕皇侄之孙，周岁，盛暑时病壮热烦呕有汗，是暑邪为患。初与香薷饮一剂，热不退，烦渴加甚。予曰：“时逢酷暑，热甚，宜加黄连。”服药后热稍平而症不减，呕渴人困，头抬不起，此热伤正气也。热甚务在必清，正气为热所伤，亦须急固。方用人参、麦冬、陈皮、半夏、茯苓、甘草、黄连、栀子、竹叶心煎服。次日精神起而热犹不退。予曰：“精神起则人参可除，热不退者清凉之力薄，当以生水之味佐之，乃克有济。”方用生地、丹皮、麦冬、黄连、山栀、石膏加以二陈和胃，连进二服，热退神安，烦渴皆定。小儿纯阳之体，暑为阳邪，最伤心脾二脏，热而烦者心受之，热而呕渴脾胃受之也。心受之则黄连、山栀，胃受之则石膏、竹叶。纯阳之体，无阴以制则热不能退，

故用生地、丹皮、麦冬生水以济阳，黄连得其资助而功始倍，更加二陈以和胃而胃气不伤，病因以愈。此症热经七日，认症的确，药有次第，故得以收功。使病家少有纷更，则变生不测矣。

风暑合病为暑风。暑喜伤心，风喜伤肝，此但有暑而无风，故虽热而惊不作，予故不用风药。

儿体本不虚，忽而神困者，是正气为热邪所伤，只宜泻热。人参只用一剂后即徐之，且大便二三日一次，里气不虚，若再用人参，必助邪为患矣。用药当见机者此也。

热退旬日，忽然又发呕渴如前，以俗情言，必曰复感。予曰：“此胃家余热未尽，天气过亢，余热复聚。”用养阴和胃稍加石膏。二剂而平。

奕皇侄之孙女，九岁，风湿发丹，遍身瘙痒三日，丹发未透，热未退，大便多日不解，腹痛，此寻常小病也。与疏托利湿消食之剂。其夜忽发惊风，目直大叫，手足搐搦，唇口连掣，少停又搐，一夜十余次，举家惊愕。延予至，初视之不解其故，再四推求，外无新感之风邪，内有未泄之湿热。据侍者云，因高处猫跳而受骇惊，由是而作。予曰：“脾经湿热断无作惊之理，因于惊则脾家所蕴之热乘惊而入于肝胆，是脾移热于肝病之变者也。此病在脾为湿，入肝则为风，肝得惊，风病斯作矣。其治法当疏肝胆之风，泄脾土之湿，表里一通，庶几骤解，稍迟病深则难救矣！为处一方：羌活、防风、天麻、钩藤、姜虫、全蝎、当归、赤芍、枳壳、大黄、山栀、木通、甘草，共十三味，其法盖合泻青丸、牵正散、四顺清凉三法，以成疏肝泄闭之方。一服而表里双解，其病如失。

义呈朱嗣琦兄孙，病春温，五朝大热不退，头痛烦渴，脉大，恶人与火，阳明邪热甚也。与小剂白虎汤。初用石膏三钱不效，加至五钱，又不效，病亦不加，但人倦耳。其家请易方，予曰：“药对症故病不加，药力轻故病不减，据症而论，无可易也。”用熟石膏一两、知母二钱、甘草五分、粳米二钱，再一剂

而热退。治麻痘石膏宜生用，《伤寒》方中石膏宜煨用。

胡旭如兄孙女，六岁，春中患发热头痛，呕吐，脉大，唇红如珠。予曰：“此胃热呕吐也。”用陈皮、半夏、茯苓、甘草、知母、石膏、粳米、煎一剂，愈。此病初作而用对症之药也。

汪利宾兄孙，发热呕吐，食少出多，长虫出自目眶陷，必烦不宁。方春木气旺，上冲于胃，宜泻肝和胃。用橘红、半夏、茯苓、甘草，加代赭二钱、水芦根五钱、黄连三分，一剂愈。泻肝热而用黄连，实则泻其子也。

岩镇潘氏子，十岁，壮热五日不退，目窠反张，头额红肿。医作惊风治，用牛黄抱龙等丸不效。请予治，诊其脉大。予曰：“此太阳风症，无汗为刚痉，今额上红肿，兼湿毒上攻，当从太阳处方。”用羌活五分，秦艽一钱。连翘、赤芍、苍术各八分，荆、防、蝉退、木通各六分，酒炒桑枝一钱。一剂病减十之三，二剂病减十之七。除去羌活、苍术，加入钩藤、菊花、炒栀子、马料豆，又二剂而痊。

岩镇方氏子，周岁，深秋无外症，夜间忽然吐乳一口，随发惊搐二次。初服表药一剂，搐不作，无热症，但夜间烦吵。又服广东抱龙、牛黄等丸，乳食如常，六日不大便。六日后又复发搐，出大便青黄色，微有痰，一连三日，抽掣无时。搐定时安卧能乳，不发热。请予治，予曰：“惊搐不由外感，无寒热痰食之患，此病从内发也。发时吐乳一口者，时方食乳，冲涌而出，非吐乳也。外症面色青，肝病也，手掣头摇，肝木生风之象。颅肿筋现，目生脂，唇口红，皆火象也。小儿纯阳之体，先天不足，不能制火，加之秋燥，衣棉早，郁遏太过，热从内生，上冲肝胆而作搐。病自内生，当从内治，用平肝养阴之剂。”生地、丹皮、麦冬、炒栀子、陈皮、茯苓、泽泻、钩藤、代赭，一剂。服药后胸中噎气，微有痰声。食乳后涌出痰二口，此隔间有阻滞。次日用分治之法：早用橘红、半夏、茯苓、石菖蒲，少加生姜，先服半杯以开其痰；午后用六味加参、麦，陆续夜服，搐虽